

Myfyrdod y Mis – Awst 2011

Myfyrdodau Byrion ar Ferched yr Hen Destament : Efa

“Rhoes y dyn enw ar yr holl anifeiliaid, ar adar yr awyr, ac ar yr holl fwystfilod gwyllt; ond ni chafodd ymgeledd cymwys iddo i hun. Yna parodd yr Arglwydd Dduw i drymgwsg syrthio ar y dyn, a thra oedd yn cysgu, cymerodd un o'i asennau a chau ei lle â chnawd: ac o'r asen a gymerodd gwnaeth yr Arglwydd Dduw wraig, a daeth â hi at y dyn. A dywedodd y dyn, “Dyma hi! Asgwrn o'm hesgyrn, a chnawd o'm cnawd. Gelwir hi yn wraig, am mai o wŷr y cymerwyd hi.” Dyna pam y bydd dyn yn gadael ei dad a'i fam, ac yn glynu wrth ei wraig, a byddant yn un cnawd. Yr oedd y dyn a'i wraig ill dau yn noeth, ac nid oedd arnynt gywilydd.” (Genesis 2: 20 – 25)

A phan ddeallodd y wraig fod y pren yn dda i fwyta ohono, a'i fod yn deg i'r golwg ac yn bren i'w ddymuno i beri doethineb, cymerodd o'i ffrwyth a'i fwyta, a'i roi hefyd i'w gŵr oedd gyda hi, a bwytaodd yntau. Yna agorwyd eu llygaid hwy ill dau i wybod eu bod yn noeth, a gwnïasant ddail ffigysbren i wneud ffedogau iddynt eu hunain.” (Genesis 3: 6-7)



of Eve gan Paolo Caliari 1528 – 88)

Lluniodd Duw Adda o lwch y tir, ac er bod digon o anifeiliaid ac ati o'i gwmpas, “nid da bod y dyn ar ei ben ei hun” (Genesis 2: 18). ‘Roedd angen “ymgeledd cymwys” arno. Felly, lluniodd Efa allan o ochr Adda. Nid o'i droed y lluniwyd hi, iddi fod yn ddarostyngedig iddo; nac ychwaith o'i ben i fod yn feistres arno, ond o'i ochr er mwyn iddynt fod yn gydradd. Sylwch ar ymateb Adda. Dyma'r tro cyntaf inni glywed hwn yn siarad. “Dyma hi!”, meddai fe. Wrth ei fodd! Heb os ac oni bai dyma ‘ymgeledd cymwys’. “Asgwrn o'm hesgyrn, a chnawd o'm cnawd.” Gwêl ei hunan ynddi hi, gwêl y berthynas annatod sydd rhyngddynt. Bellach, mae ei dynged ef ynghlwm wrth ei thynged hi. (Llun: *The Creation*

“Yr oedd y dyn a'i wraig ill dau yn noeth ...” Yng nghwmni eu Creawdwr mae'r ddau yn hollol ddiameddiffyn ond yn hollol ddiogel, “ac nid oedd arnynt gywilydd.” Buasai'n braf pe bai hon oedd brawddeg glo'r stori; y dechrau yn addo parhad y llawenydd. Fel hyn yr hoffwn weld stori dda yn gorffen ond mynd ymlaen y mae hon, ac wrth fynd ymlaen mae pethau'n gwaethygu.

Fe ddaw'r sarff, “yn fwy cyfrwys na'r holl fwystfilod gwyllt” (Genesis 3:1). Fe wyddoch yr hanes! Wedi gosod mwy o bwys ar eiriau llyfn y sarff nag ar Air Duw, cymerodd Efa o ffrwyth y goeden yng nghanol yr Ardd, a'i roi hefyd i Adda. Sylwer nad oedd angen rhyw lawer o berswâd ar Adda, “a bwytaodd yntau” yn ddigon bodlon. Nid hudoles mo Efa, ac Adda druan yn ddiniwed. Mae'r ddau mor ffôl â'i gilydd, yn dilyn wrth gwt y sarff i ganol storm o ofidiau. (Llun: *Adam and Eve* gan Raphael (1483-1520). Hawlfraint: Lluniau'r Fatican)



*“... gwyddost gudd feddyliau 'nghalon
a chrwydriadau mynych hon:
O tosturia,
ymgeledda fi â'th ras.*

(R.M. Jones (Meigant; 1851 – 99) C.Ff. 700)